

TE NEHEURAA API

NENEIHIA I ROTO I TE PIHA NENEIRAA A TE EKALESIA A IESU MESIA I TE
FEIA MO'A I TE MAU MAHANA HOPEA NEI.
PAPEETE, TAHITI, I TE MAU AVA'E ATOA.

Te hoo: E 2 farane i te matahiti.

No. 8

Atete 1937.

Mat. 31.

I te otiraa taua orama rahi ra, tupu faahou atura te tahi orama rahi e te nehehehe, oia hoi, fa maira te peropheta ra o Eliaha, tei afai tinohia i nia i te ra'i ma te ite ore i te pohe, e ua parau maira ia maua: Inaha, ua tae mau â te tau tei parauhia na roto i te vaha o Malaki, tei parau e, e tonohia mai oia, o Eliaha, na mua i te taeraa mai o te mahana rahi mätä'u o Iehova: no te faafariu raa i te aau o te mau metua i ta ratou mau tamarii, e te aau o te tamarii i to ratou mau metua, ia ore te fenua nei ia tairihia i te ino. No reira te horoa hia'tu nei, ia orua, te taviri no taua ohipa ra: e na roto i te reira, e ite ia orua e, ua fatata roa taua mahana rahi mätä'u o te Fatu ra, oia mau, tei te uputa noa iho. Buka Fafau 110:13-16.

E inaha, ei tuatiraa i te parau i faahitihia i nia nei e horoa'tu vau i te parau a te hoê peropheta, tei tiatonu noa to'na mata i nia i te faahoiraa mai o te autahu'araa, tei heheuhia mai to'na hanahana i te mau mahana hopea nei, e tei hau roa i te haapaohia e ana, e tufaa hanahana o te evangelia, oia hoi, te ohipa no te feia i pohe ra; ua na ô mai o Malaki i roto i te pene 4, irava 5 e te 6; Inaha, e tono na va i te peropheta o Eliaha ia outou na, hou te taeraa mai o te mahana rahi e te mätä'u a te Fatu ra: ia faafariu i te aau o te metua i ta ratou mau tamarii, e te aau o te tamarii i to ratou mau metua, o te haere mai hoi au e o te tairi i te fenua nei i te ino. Buka Fafau 128:17.

O Eliaha atoa, ta'u i horoa i te mau taviri, no te mana no te faafariuraa i te aau o te mau metua i to ratou mau tamarii, e te aau o te mau tamarii i to ratou mau metua, ia ore te ao nei ia tairihia i te ino. B. F. 28:9.

Ua au te Ohipa a Iosepha Semita I ta te Mesia.

MAI te mea e faaau tatou i te ohipa a Iosepha SEMITA i te ohipa a Iesu Mesia, e ite tatou e, e mea huru fatata ta raua ohipa.

Ua fanauhia o Iesu mai te haehaa e ua veve roa to'na na metua. E i muri iho ua ite tatou e, ua tamata te arii ra o Heroda ia taparahi i te mau aiu atoa i te reira anotau, e no reira ua haere o Iosepha raua o Maria e ta raua tamaiti iti i Aiphiti. Ia pohe o Heroda, ua tia ia ratou ia ho'i mai i te ratou fema e ia rave faahou i ta ratou mau ohipa maitatai. Ia tae o Iesu i te ahuru mapiti o to'na matahiti, hoê â huru to'na ite e to'na paari i to te mau rabi e to te mau taata ite, e e mea pinepine to Iesu haereraa i te Hiero ia paraparau atu ia ratou. Ua ite to'na na metua i te huru no to'na paari e ua mana'o raua e, e mea maere te reira. I te reira taime ua ite o Iesu i te huru no ta'na ohipa e ua vai noa i roto ia-na te îraa o te Varua o te Atua.

I muri iho ua haamata o Iesu i te ohipa a to tatou Fatu. Ua maiti o Iesu i ta'na mau Aposetolo e ua haamata ratou i te faatia i te Ekalesia a Iesu Mesia; ua haere o Iesu, e ta'na mau Aposetolo, i te mau vahi atoa e ua haapii atu ratou i te mau feia atoa i te huru no te Evanelia, e ua faaora oia i te mau feia matapo e te mau huru ma'i atoa. Aita i maoro tupu atura te riri e te haavare i roto i te mau taata e ua faahapa ratou ia Iesu, e ua ite tatou i te hopea, ua faasatauro ratou ia'na i te toru ahuru ma toruraa o to'na matahiti.

E i teie nei, e hi'o tatou i te huru no te oraraa o Iosepha SEMITA. Mai ia Iesu te huru, ua fanauhia oia ma te haehaa i roto i te hoê fare nainai i nia i te hoê faaapu iti, e ua veve

hoi to'na na metua. I to'na apîraa aita i tia ia'na ia haere i te fare haapiiraa, no reira ua haapii noa oia i roto i ta'na mau buka. Ia tae oia i te ahuru ma maha o to'na matahiti, mai ia Iesu te huru, ua haamata to'na ite e to'na paari, no ô mai i te Atua ra. I muri a'e i te orama matamua a Iosepha, ua faaite te Atua ia'na i te huru no ta'na opuaraa e ta'na mau ohipa. Mai te faatereraa a te Atua, e mai ia Iesu te huru, ua faatia faahou-hia, e Iosepha SEMITA, te *Ekalesia a Iesu Mesia I te Feia Mo'a no te mau Mahana Hopea Nei*. I muri rii iho, ua maiti o Iosepha i ta'na mau Aposetolo, e ua haamata ratou i te ohipa mau a te Atua.

Ua haere ratou e ua haapii atu i te mau taata atoa i te Evanelia. Aita i maoro ua faaroo te mau taata e rave rahi i te Evanelia e ua bapetizohia ratou. I muri iho ua tupu te riri e te mauruuru ore i roto i te mau taata no rapae i te Ekalesia e ua tamata ratou i te haamou i te reira, e no reira, mai ia Iesu i te huru, ua rave ratou ia Iosepha, e i te hopea ua taparahi ratou ia'na i te toru ahuru ma iva o to'na matahiti. Ua mana'o te mau enemî no te Ekalesia e, e mou te Ekalesia no te mea ua pohe te peropheta, oia hoi, te Peretiteni no te Ekalesia. Ua hape roa te reira mana'o, no te mea e, e ere ia i te Ekalesia na Iosepha SEMITA, maori râ te Ekalesia a te Atua, e noa'tu te mau peapea, ua tere noa te Ekalesia i mua, e teie nei aita e nehenehe i te Ekalesia ia faaea faahou, no te mea e ohipa mau teie na te Atua, mai tei papaihia i roto i te Apokalupo, i te pene 14, irava 6 e te 7.

Hi'o atura vau i te hoê melahi i te maueraa na ropu i te re-
va ra: Ma te evanelia e tia i te vairaa ra, ei pororaa'tu i te feia
e parahi i te ao nei ra, i te mau fenua atoa e te mau opu atoa
e te mau reo atoa e te mau nunaa atoa. I te pii-hua-raa te reo
e, A mata'u i te Atua, e faahanahana'tu ia'na. Ua tae hoi i te

hora faautu'araa na'na ra, e haamori outou ia'na i tei hamani i te ra'i, e te fenua, e te tai e te mau pape pihaa ra.

Teie Evanelia tei papaihia i roto i teie na irava, o te EVANELIA IA A IESU MESIA I TE FEIA MO'A I TE MAU MAHANA HOPEA NEI.

Papaihia e Ra efa Orometua,

Te Ture no te TUFAA AHURU.

UA riro te *Tufaa Ahuru* ei faito e ei ravea no te faaiteraa no to tatou mauruuru e to tatou au maitairaa no te mau haamaitairaa e rave rahi ta to tatou Metua, i te ra'i, e ninii noa mai nei, i nia ia tatou nei, i te mau mahana atoa.

Te haamaitai nei Oia ia tatou na roto i te mau mea atoa e vai nei ia tatou; to tatou oraraa nei, te mata'i ta tatou e huti nei, te maa ta tatou e amu nei, te fenua ta tatou e taahi nei e te ahu ta tatou e oomo nei, oia hoi, te mau mea atoa tei vai ia tatou, e mau haamaitairaa ia no ô mai i te Atua ra. No reira, no te tamataraa i to tatou auraa i te reira mau haamaitairaa, ua ani mai Oia ia aufau tatou Ia'na te *Ahuru* o te moni tei noaa mai ia tatou, ei *Tufaa Ahuru* e ei mau *O*, eiaha no te mea te hinaaro ra Oia i te reira, (no te mea o te Atua te fatu no te mau mea atoa e vai nei.) No te mea e mea tia ia horoa, e na roto i te reira horoaraa e farii ia oia i te mau haamaitairaa tei faaineinehia na'na ra.

E ere ana'e te Atua ta tatou e haamaurunru nei na roto i

te horoaraa i te *Tufaa Ahuru*, te haamanruuru atoa ra ia tatou ia tatou iho, no te mea te ite ra tatou e, te hi'o papu ra tatou i te oraraa nei na roto i te haapaoraa i ta te Atua i faaue mai; te faaamu atoa ra tatou i to tatou taata tupu tei poia no te mea ua veve a'e oia ia tatou iho; te tauturu atoa nei tatou i te paturaa i te mau fare pureraa e te mau hiero, e a na reira'i tatou, te rave ra ia tatou i te hoê ohipa rahi tei faauehia mai e te Fatu, ia ravehia e to'na mau taata i nia i te fenua nei, oia hoi, ia patu i te fare pureraa ia tia i te taata ia haaputuputu i reira no te haamoriraa'tu i te Atua; e ia patu i te Hiero ia ravehia i reira te mau oro'a mo'a.

E i teie nei, e au mau Taeae e au mau Tuahine here, ua ite tatou i te faufaa rahi no te reira ia tia ia tatou ia hi'o i te reira pae o te oraraa ma te papu, e ia haamo'a tatou i to tatou mau oraraa, i roto i teie Ekalesia, no te faahaereraa i te ohipa a te Atua i mua.

Aita'tu e tapao rahi a'e no taua haamo'araa ra, maori ra te horoaraa i te mea tei titaubhia e te Fatu, no reira, e tufaa te ture no te *Tufaa Ahuru* no te Evanelia; o te haamoriraa e te iteraa mau i te Atua. E faito tia mau te reira no te faaroo mau, e na roto i to'na haapaoraahia, e tia i te mau taata atoa ia ite i te ora o to'na iho faaroo e te here i te Atua.

Ua na ô mai te hoê peropheta; *Ia haamo'ahia te Tufaa Ahuru na te Fatu*. E mo'a atoa te reira ia tatou, e au mau Taeae e au mau Tuahine, ia horoa tatou i te reira ma te here, te oaoa e ma te hinaaro mau no te ohipa rahi.

Ia tauturu mai te Atua, ia tatou, ia na reira, o ta'u ia pure na roto i te i'oa o Iesu Mesia, amene.

Papaiha e Veranona Orometua.

EDITORIALE

THOMAS L. WOODBURY.

E Oraraa Haapao.

MAI to'na hamaniraahia mai, ua riro te taata nei ei taata haapao. I to tatou fanauraahia ua haapao-hia tatou e te hoê e tia'i: o te tamarii nei, o te mea ia tei hau atu paha i te paruparu i rotopu i te mau mea ta te Atua i hamani. Eaha te huru o te haapaoraa a to tatou mau metua, ia tatou, i to tatou nainairaa. To ratou mau mafatu tei nia uoa ia ia tatou te vairaa, eaha, eita anei e tia ia tatou ia na reira atoa, e ia fariu atu i nia ia ratou, inaha, ua paari tatou i teie nei e ua tia ia haapao. A rave ana'e tatou, no ratou, i te mau mea te ore e tia ia ratou ia rave no ratou iho.

Ua na ô o Malaki i te pene 4:6: *Ia faafariu oia i te aau o te mau metua i te tamarii, e te aau o te tamarii i to ratou ra mau metua, o te haere mai hoi au, e o te tairi i te senua nei i te ino.*

Ua fâ mai te peropheta ra o Eliaha, ia Iosepha Semita rana o Olive Taudere, i roto i te Hiero i Ketelani, i te 3 no Eperera 1836, e ua horoa mai ia raua te taviri no te raveraa i te ohipa faaora no te feia i pohe ra. Eita taua ohipa ra e oti i te feia i pohe ra, ia rave no ratou iho, no reira e mea tia ia rave e ia haapao, te feia e ora nei, taua ohipa ra no to tatou mau metua, o te ore roa e oti ia ratou iho ia rave.

Ua parau o Paulo i roto i te I Korinetia 15:29: *Aore ra, eaha ihora te feia i baptizohia no te feia i pohe ra, ia ore roa te feia i pohe ra ia tia faahou? eaha ihora ratou i baptizohia'i no tei pohe ra?* Ua au roa ia'na te ohipa i ravehia e te mau feia e ora ra no to ratou mau fetii i pohe ra.

Ua patuhia te Hiero, i teie Tau tuuraa Evanelia hopea nei, no te reira ohipa rahi. Te tufaa matamua o taua ohipa ra, o te ite maitairaa i to tatou mau tupuna. A haapii i to outou paparaa tupuna; a imi i te mau i'oa o to outou mau fetii i pohe ra, a papai te reira i nia i te hoê parau e a hapono mai i te Fare Orometua, te haamata nei matou i te tabula i te reira mau i'oa. A tauturu mai ia matou no te haapapuraa i te mahana e te fenua no te fanauraa, te poheraa, te faai-poiporaa, te i'oa o te metua tane e te metua vahine, etc. A haapapu e a faaoti maitai i te mau papairaa ia tia ia matou ia tabula e ia haapao maitai i te reira.

Ia tae te tau e tia'i ia rave i te ohipa i roto i te Hiero, e riro ia te Misioni no Tahiti ei aratai i roto i taua ohipa rahi ra.

I na mahana i mairi a'enei, te 13 no Fepuare 1937, ua hoo-hia mai, e te Ekalesia, te fenua tiaraa Hiero i Navu, e ua hoo atoa hia mai, i na tufaa fenua o Tarafonia e Idaho, te tahi nau vahi fenua maitai no te paturaa i na hiero i reira.

Te haere nei taua tufaa ohipa ra i mua, i roto i te Ekalesia, e te oaoa nei te feia mo'a atoa i te reira.

A rave ana'e tatou i ta tatou tufaa i Oceania nei.

TE PARAU AUTAHU'ARAH.

TIHOTI M. Lake
LEVI Leatham

BENIAMINA Winkel
ELEDONA Mortensen

Haapiiraa no te Ava'e SETEPA,

TE OHIPA NO TE HIERO.

Te 5 no Setepa. A rave i te mau parau i papaihia i nia i te api matamua o teie nei ve'a. A haapii atu i te mau melo e mea nafea te papairaa i te mau api; a faataa maitai atu

i teie mau parau, oia hoi, te mahana e te fenua no te fanau-raa, te i'oa o te metua tane e te metua vahine, te mahana e te taata i faaipoipohia, te mahana poheraa; e faaite atoa i te mahana bapetizoraa, no te tuuraa rima, e te Autahu'araa i mauhia.

Te 12 no Setepa. A ani i te mau melo no te Autahu'araa ia afai mai i ta ratou mau api, ia tia ia hi'opoahia e, e mea afaro maitai te mau papairaa. A tapea'tu te mau parau tumu e a haponu mai te hoho'a, i te Fare Orometua, na roto i te i'oa o te Peretiteni Amaa.

Te 19 no Setepa. A faaanu to outou haereraa na rotopu i te mau taata atoa o te fenua i parahihia e outou, a ani atu ia tabula ratou i te i'oa o to ratou mau tupuna. A a'o atu ia ratou i te parau no te ohipa e ravehia i roto i te Hiero. A faaairo i te reira ohipa ei ohipa rahi a'e i roto i te ava'e no Setepa nei.

Te 26 no Setepa. A opani i te mau papairaa atoa no te mau ohipa e ravehia i roto i te Hiero e a haponu mai te mau hoho'a i te Peretiteni Misioni i Papeete nei.

Maururu.

TE HIERO I KETELANI

Te tomoraa o te Hiero i Ketelani, i te tufaa fenua Ohio.

Eaha te mahana te 27 no Mati 1836?

Te hoê mahana rahi te reira mahana i roto i to tatou parau tuatapapa, no te mea e, ua tomohia te Hiero matamua i te mau mahana hopea nei, oia hoi, te Hiero i Ketelani.

No te aha ua faatia to tatou Ekalesia i taua hiero ra?

No te mea ua tae mai te parau, no te Atua mai, a faatia i te hoê fare na te Atua. B. F. 88:119.

Ua tae mai te hoê faahaparaa, ta te Atna i horoa mai, te na ô maira oia: *Ua hara outou ia'u no te mea e, aita outou i feauri na nia i ta'u parau rahi ia outou, oia hoi, a faatia i te hoê fare no'u, e ia nehenehe, ia horoa'tu Vau, i ta'u mau Aposetolo, te mana no nia mai i te ra'i, e ia rave i ta'u ohipa maere, e horoa'tu i to'u varua i te mau i'o atoa.*

No reira, a hamani outou i to'u fare mai teie te huru, e pae ahuru ma pae pie i te aano, e e ono ahuru ma pae pie i te roa, o te pae i roto teie. Te pae i raro, e vahi te reira no ta outou mau oro'a, e ta outou mau a'oraa, e ta outou mau haapaeraa maa, e ta outou mau pureraa, e to outou mau hinaaro maitatai i te Atua.

E te vahi i nia, e vahi te reira no'u, ia nehenehe Ia'u ia haapii atu i Ta'u mau Aposetolo.

Ua hamani ratou i te Hiero mai te reira i te huru, e i te 23 no Tiurai 1833 ua faatia ratou i te mau poro no taua Hiero ra. E ua faaitoito ratou e tae noa'tu i te 27 no Mati 1836, te mahana tomoraa ia.

I taua mahana ra ua tae atu te mau taata i te Hiero, i te poipoi, no te tomoraa. Ua na ô mai o Hebera C. KIMBALL, ua tae mai, i roto i te reira pureraa, te hoê melahi e ua parahi oia i pihaiho ia Iosepha SEMITA, te metua, e ia Frederika G. WILLIAMS, e e mea nehenehe ia ite papuhia to'na huru mau. E taata huru roa oia, e mea ereere to'na ori'o mata e e mea uouo to'na rouru, e to'na ahu e mea roa ia, ua fatata i te perehahu na nia i te fenua, e te vai ra to'na tiaa.

Ua na ô mai o Hebera, ua tonono mai te Atua i taua melahi ra, ia farii oia i te tomoraa o taua Hiero ra.

I roto i te pure ua ani atu o Iosepha, i te Atua: *A farii mai Oe i teie nei fare tei faatiahia mai ta Oe i fauue mai ia matou nei. E ere te fare nehenehe mai te Hiero a Solomona te*

huru, area ra, ua hamani matou i teie nei fare i te tau o to matou peapea rahi. A haumaitai mai i to Oe nei feia i roto i to ratou pureraa, e a horoa mai i te ite i te mau taata tei tae mai i roto i teie nei fare, ia huamori ratou ia Oe, e a haamaitai mai i to Oe mau tavini e to Oe mau feia atoa. E a fauhapa i te mau enemi, e a tauturu i te mau Hau, te mau Arii e te mau tamarii a te mau Arii, e te mau feia mu'i, e te mau taata veve, e te huaai a Iakoba, e te huaai a Iuda, e te huaai a Iseraela. E a haumaitai mai ia'u, e to'u utuafare, e te mau taata toroa i roto i ta Oe Ekalesia, e te Ekalesia atoa e te mau utuafare i reira.

Teie ia te haamataraa no te raveraa i te ohipa na to tatou hui tupuna.


Papahia e Noela Oromelua.

Na Te Mau Maapii Mahaere na te mau utuafare,

TE TATARAHAPARAA.

E te faaroo nei matou e, o taua mau faaueraa ra, te piti ra, o te tatarahapa ia. Ohipa 2: 38; II Kor. 7: 9-10; Luka 13: 3; Ephesia 4: 25-32.

Teie nei mau parau matamua o te Evanelia nei, o tei hau ia i te maitai ia haapiihia i te taata paatoa. Ia ite papuhia taua parau ra, e ia haapaohia atoa hoi e o ai te taata i roto i te batileia o te Atua.



TE SOTAIETE VAHINE TAUTURU.MAUDE WOODBURY.
TOTARE GREEN.NOROTA HARDY,
JOSEPHA G. STEVENS.

Haapiiraa no te Ava'e SETEPA.

MAHANA MAHA MAAMUA.

Te aroha rahi o te Mesia i te Vahine.
Mataio 15: 21-28; 22: 23-33; 26: 6-14.

E mea arohahia te Vahine e IESU, e ua haamaitai oia ia ratou i taua a-notau ra. Mai te Mesia hoi i haamana'o i te vahine haapao maitai, e na reira tatou i te SOTAIETE VAHINE TAUTURU ra.

E tufaa'tu i teie nei ohipa i na tuahine e toru, e ia oti ta ratou paraparaa ra, e iritiraa mana'o ia i te taima toe. O te ohipa ia no te mahana matamua no te ava'e ra.

MAHANA MAHA PITI.

E habaere na Tuahine i te mau utuafare e haapii i te parau i papaihia i roto i te Mataio pene 7:24-29. Ia riro te mau tuahine mai te taata paari te huru o te patu i to'na ra fare i nia i te pāpā.

E haapii i te tamarii ia paruru ia ratou iho i te mau ino o te ao nei, e ia tamatahia ratou e te Diabolo, ia etaeta ratou mai te ofai i te huru.

MAHANA MAHA TORU.

E maiti i te tahi parau no roto mai i te Buka a Moromona.

MAHANA MAHA HOPEA.

E haamana'o i te parau i neneihia i te apī hoē o teie nei ve'a.

I rotopu i na ino e piti eiaha e maiti i te hoē; I rotopu i na maitai e piti ra, a maiti ia raua apipiti atoa ra.

* * *

E faatere te hau i te mahana i te vahi na te feruriraa e faatere i te mana'o.

HAAPIIRAA SABATI.

Goladena W. Mack Teneta A. Wilde Anderea N. Machen

No te Ava'e SETEPA.

IRAVA TAMAU AAU: Buka Poe Tao'a Rahi, apŷ 51, irava 33.

Pii mairu oia ia'u i to'u i'oa e parau maira oia e, e ve'a oia tei tonohia mai ia'u, mai mua mai i te aro o te Atua, e o Moroni to'na i'oa; e ohipa ta te Atua e vai ra na'u e rave; e riro hoi to'u i'oa ei maitai e ei ino i rotopu i te mau nunaa, te mau opu e te mau reo, e aore ra e parau maitaibia e e parau ino atoa hia ia i roto i te mau nunaa.

Na te Pupu 3 e te Pupu 4.

Te 5 no Setepa: Mosia pene 13. Abinadi.

12 " : " 15-16. Abinadi

19 " : " 17. Te poheraa o Abinadi e te tatarahaparaa o Alama.

24 " : " 18. Te Pape o Moromona.

Na te Pupu Piti.

Te mau irava i neneibia i roto i teie nei Ve'a no na Haapii hahere na te mau utuafare, oia hoi, te parau no te Tatarahapa,

Te Paraimere.

Parau tamaa aau: *Mai te au i ta outou horoaraa ia vetahi e ua horoa atoa mai outou i te reira ia'u nei.*

Haapiiraa.

Te 5 no Setepa: *Mareko 12:41-44. Na lepeti a te vahine iwi.*

Te 12 no Setepa: *Mataio 17:24:27; 22:15-22. Te moni aufau.*

Te 19 no Setepa: *Luka 14:16-24. Te amuraa maa rahi.*

Te 26 no Setepa: *Buka a Moromona. Te parau faaite a te mau Ite.*

HAAPIIRAA NA TE FEIA API.

TENA Palmer

VERANONA C. Thurgood

NOELA. C. Devey

HAURATA Heusser

Irava tamau aa: Buka Fafau 89: 20-21.

E horo hoi e e ore e rohirohi; e haere hoi e e ore e tiu. E te faaite atu nei au, te Fatu, ia ratou i te parau e, e fariu e atu te melahi taparahi ia ratou, mai ia'na i na reira i te tamarii a Iseraela ra, mai te taparahi ore ia ratou.

HAAPIIRAA NO TE AVA'E SETEPA.

Te 5 no Setepa. *Te ino no te inuraa ava.*Te 12 " *Te ino no te puhipuhiraa e te amuraa i te avaava.*Te 19 " *Te huru maa o tei hau i te maitai no te paeau tino nei.*Te 26 " *Te huru maa o tei hau i te maitai no te pae varua.*

A maiti i te tahi mau Feia Apî no te a'oraat'tu i te tahi maa parau poto no nia i te parau tumu i faataahia no te reira Sabati.

A faaineine atoa i te tahi mau himene maitai, e a faaitoitō i te umeraa mai i te mau taure'are'a ia haere mai e ia rave atoa i te tahi tufaa ohipa.

A faariro i ta outou mau putuputuraa ei mea maitai e te oaoa hoi; A maiti e maha taata, i te mau po Sabati, na ratou te tufaa a'oraa, e a hiopo'a maitai ia au ta ratou mau parau i te parau tumu i faataahia no te reira Sabati.

Te haapii nei tatou i te rave, na roto i te raveraa.

TE PARAIMERE

ROBETA M. Johnson.
RAREFA R. Taylor.

HENERE C. Teeples.
PERETI B. Asay.

Ua haamatahia te Paraimere i te Amaa no Papeete, i te 8 no Tiurai, i te hora iva i te poipoi. Ua rahi roa te mau tamarii tei tae mai i taua mahana ra. Ua haapiihia te tahi mau himene apî, e i muri a'e ra, ua arearea ratou atoa. Ua na ô mai te mau tamarii, ua hau roa taua haapiiraa ra i te maitai.

HAAPIIRAA NO TE AVA'E SETEPA.

I teie nei ava'e a haapii i te mau parau matamua no te Ekalesia, oia hoi;

1. *Te Faaroo.* Ioane 8:31-32; Iakobo 2:26.
2. *Te Tatarahapa.* Ohipa 2:38; Apokalupo 3:19.
3. *Te Bapetizoraa.* Mareko 16:16; Ioane 3,5.
4. *Te Varua Maitai.* Ohipa 8:16, 17.

TE MAU PARAU API

I teie nau mahana i mairi a'enei ua vitiviti roa te mau ohipa i ravehia e te mau pŭpŭ taata tei amui mai i Papeete nei no te arearea raa: te mau himene, te mau otea, te mau ahū nehenehe e te faatereraa, e mea au roa, E anotau teie o tei hau i te oaoa no te mau taata, e ia haaputuhia te hui taata i te vahi tunurua maa, e taime poupou mau ia ia ineine te maa e ia faatamaahia te taata e rave rahi. E mau mahana faaturaraa te reira i te Hau Farani, e e moni rahi roa tei haamauahia no te tautururaa i te mau pŭpŭ taata no te mau ohipa i ravehia e ratou, e eita te reira e mo'e vave ia ratou, Ua mauruuru te taata atoa no taua ohipa maitai ra e ua himene ratou i te maitai o te Hau Farani. Eiaba ia mo'e ia tatou te tumu no teie nei arearea raa e te maitai o te tae mai ia tatou nei, i te rima o te mau taata toroa o te Hau Farani.

Ua mauruuru tatou i to tatou taeae o W. TENA Palmer ma e te mau taeae atoa no Niau. Ua itoitro roa ratou i te ohipa no te Ve'a, oia hoi, 12 vea tei hoohia'tu e ratou. E homa ua mauruuru tatou no taua ohipa ra, no reira ia na reira atoa outou, te mau Orometua, te mau Peresibutero tia i e te mau taata atoa o te titau i te parau api i te mau fenua moana nei. Tauturu mai.

Te parau nei te taata ra o Glen VOLIVA, te taata faatere no te haapao-raa Davieism, te "vai parahurahu noa nei â teie nei ao." O te mea ua mau te tahi mau pahi reva Rutia na nia i te vahi i parauhia te poro apatoerau, na te reira i haapapu, i roto i to'na mana'o e, e mea parahurahu ihoa te ao nei, noa'tu i te haapiiraa a Christofa Calumabusu o te mau feia paaari o teie nei tau tei parau mai e, e mea menemene teie nei ao.

Ua vaiihohia te imiraa i te vahine faatere pahi reva ra o Amelia Earhart tei moe a'enei i tua a tamata'i oia i te faaati i te ao nei. I to'na toparaa i tua e mea fatata oia i te fenua Vaihi, e aita roa oia i itehia, noa'tu e ua haamau'ahia, e te Hau America, e maha milioni, 4,000.000, tara no te imiraa ia'na.

No to'na mātā'u o te taparahihia oia, ia faarue o STALINE, te taata faatere no te Hau Rutia, i to'na fare tei tiaihia, e haere oia e na taata e hoê ahuru ma maha i roto i na pereoo uira e toru. Ua au te ahuru e te ho'ho'a mata i to taua taata ra, no reira e mea fifi ia parau e teihea oia. I te mau mahana atoa e tau i oia i te parahiraa e te pereoo atoa hoi, no reira, eita roa e tia ia parau e, tera o Staline, i rotopu i teie mau taata e hoê ahuru ma pae ra.

Aita oia i hinaaro i te eia ?

I te 19 no Tiurai i mairi a'enei, i te oire ra i New Jersey, Amerika, ua tamata te hoê taure'are'a i te faatere i te hoê pereoo uira, e a tamata noa ai oia ra ua haere mai te hoê mutoi i pihaiho ia'na ma te parau atu: 'eaha, eita e tere?' Pahono atura te taure'are'a: 'aita,' Hi'o atura te mutoi i roto i te vahi faatereraa e parau atura: 'e ere i te mea maere, aita e taviri': paheru atura te taure'are'a na roto i to'na mau pute, aita ra te taviri i iteahia. Tanao atura te mutoi i roto i to'na pute piripou e horoa'tura i te hoê taviri i te taure'are'a: ua tano maitai taua taviri ra e aita i maoro tere atura te machine. Area ra, parau atura te mutoi: 'Eiaha na e rû, e tau hoa, e horo atoa taua, no'u teie pereoo e tei nia taua i te e'a e tae atu ai i te fare auri.'

Ua tano te imiraa i te parau i roto i te Bibilia.

I teie nei tau na ava'e i mairi a' nei, ua heru te hoê taata paari, o GLUCK to'na i'oa, i te repo i te hoê fenua e vai ra i pihai iho i te roto ra o " Miti Pohe " ei imiraa i te vetahi mau mea no te mau anotau tahito roa ra a haere ai o Iesu na taua mau fenua ra e inaha, farerei atura te mau taata e o ra i taua fenua ra, i te ofai auri e i te veo i nia i te hoê mou'a. Tupu ihora te maere o teie nei taata o M. Gluck, no te mea ua tano noa ihora taua vahi ra i te vahi i faahitihia i roto i te Deuteronomi i te pene 8, e te irava 9 i te na ô raa e: Ei reira oe e amu noa'i i te maa, ma te o'e ore, e rahi noa te mau mea atoa e noaa mai ia oe; e fenua ofai auri, e i roto i te mou'a e ô hia'i te pinra veo ra.

Ua pohe roa o Marconi.

I te 18 no Tiurai i mairi a'enei ua pohe roa te taata ra o MARCONI. O oia te taata tei ite matamua i te ravea no te paraparau na roto i te reva, oia hoi te radio, e na roto i taua ravea ra ua haamaitaihia to te ao atoa nei e ua haere te maramarama i mua. E faufaa rahi ta'na, e ua faahanahana hia oia e te mau hau atoa e ua rahi roa to'na faatura raa hia e to'na ihora hau, oia hoi, te hau Italia.



Louis Drollet Gérant

Thomas L. Woodbury Imprimeur.

Rue Dumont d'Urville, Orovini, Papeete, Tahiti.